

فاطمة عجيبة

من نبض قلبي

أشعار بالعامية المصرية

الطبعة الأولى ٢٠١٧

بطاقة الكتاب

عنوان المؤلف : من نبض قلبي
المؤلف : فاطمة عجيبة
التصنيف : أشعار بالعامية المصرية
رقم الإيداع : 2017-27631
عدد الصفحات : 100 صفحة
رقم الإصدار الداخلي : 93
تاريخ الإصدار الداخلي : 2017 / 12 طبعة أولى
تصميم الغلاف والتنسيق : دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

سجل تجارى : 13242
بطاقة ضريبية : 165-5-00031-572-01-35
رقم التسجيل : 2017-7 544-662-202
E-mail: alnile waalforat@yahoo.com
twitter: النيل والفرات
youtube: alnile waalforat@yahoo.com
facebook: alnile wa alforat
هاتف : 01011256943 - 01116202218 - 01202541192



الشرقية - العاشر من رمضان - مجاورة ١٣ - عقار ٣٠٤ - الدور الثاني - أمام سنتر ١٣

الإهداء

إلى امي الغالية

التي كانت ولا زالت سببا في نجاحي وتقديم يد العون وازالة العقبات
من خلال تشجيعي المستمر علي مواصلة النجاح

إلى زوجي الحبيب

الذي اكن له كل حب وتقدير فهو سبب مباشر في نجاحي وهو رفيقي
في مشوار حياتي

دائما يشجعني على الاستمرار في الكتابة وحضور الندوات ادامه الله
بصحة وخير

إلى أصدقاء العمل والدارسة

علي راسهم مديرتي العزيزة اثناء التي تشجعني وتحثني علي
الاستمرار وكثير من أصدقائي لهم مني كل الحب والتقدير

إلى كل من شجعني ولو بكلمة فهم اصحاب فضل عليه بعد
الله عزوجل ومنهم ابنة عمي ام طلعت

فاطمة عجيبة

مقدمة

رغم كل ما نقاسيه في حياتنا اليومية من ضغوط ومتطلبات قد تؤثر سلبا على مسار حياتنا إلا أنه من الضروري الالتفات قليلا للجانب العاطفي داخل النفس البشرية لأن هذا الجانب هو الذي يعيننا على تحمل مصاعب الحياة

لذلك وجدت إنه من الضروري كتابة ديواني العاطفي هذا من نبض قلبي الذي يحمل الكثير ويخفف عنا أعباء الحياة

وقد تناولت في هذا الديوان قصائد عاطفية متنوعة مابين الهجر والوصال والتلاقي
فهكذا هي حياتنا

ليست وردية كالأحلام ولكنها أحيانا قاسية لذلك تنوعت القصائد لتبوح بأسرار القلب وما يخفيه لعله يكون ديوانا فضفضة من القلب إلي قلوب العاشقين والمحبيين
(من نبض قلبي)

لملم جروحك

لملم جروحك
واستعد للرحيل
واكتم ف نوحك
دا أنت ياما قاسيت كثير
أمسح دموعك
من علي خد الزمن
وأفرد ضلوعك
دا انت ياما دفعت التمن
وارضي بنصيبك
وافتح ذراعاك للحياة

إيه كان يصيبك ؟؟؟
لو ضاع منك طوق النجاه
أطوي الحنين
وانزع بيدك الأمل
وبلاش تلين
حلمك أكيد راح يكتمل
انسي اللي كان
وأبدأ ف عهد جديد
هو اللي خان
وقبضته كات م حديد
خليك شجاع
وأرفض يعيش قلبك حزين
من غير صراع
بكره اللي جرحك ليك يلين

ما كانش عشمي

عشمتني وياك بالجنه
فجأه لاقيت الوضع اتغير
اتحولت الدنيا في ثانية
وبقيت واقف كده متحير
كنت أنا فاكرة معاك هتهني
لكن فجأة كله ؛-----اتغير
ياما كتير كانوا بيتمنوا
يتقربوا بس انا متحير
حلمت أعيش وياك واتهني
حلمي لاقيته كمان اتدير

وصوت م العقل

بيقولي استني

كل حياتي راح --تتغير

وانت اختارت تسبب الجنه

واللي يسيبني عمره قصير

فرحة عمري

حبك نورلي ليالية
حلي الدنيا جوا عينية
وبقيت شايفة الكون ده جميل
وباشوف طيفك صبح وليل
آه يا حبيبي آه لو تعرف
ألحان حبي ف قلبي بتعزف
باسهر ليلي افكر فيك
وفي احلامي انا بناجيك
خليك دايمًا قريب مني
اوعي تفكر تبعد عني

يكفي وجودك قدام عيني
فرحة عمري لما تجييني
آه لو تعرف أنت يا غالي
ازاي حبك غير حالي
زود شوقي -----
وعطفي وقربي ---
لحظة ف حبك
اغلي ما عندي
تعيش لية يا اغلي مالية
ياللي وجودك احلي هدية

جرح متفصل

عدت سنين كده علينا
ملاقينا حد يداوينا
وكان الجرح متفصل
ومعمول بالخصوص لينا
يا جرح وجاي ع مقاسي
كفاية تعبت وبقاسي
خف الحمل عني شوية
خليك جدع إنت وراسي
ابعد ياريتك تنساني
هو انت ليه كده اناني

بتحب بس مصلحتك
دايما مزود أحزاني
اهجرني وإنساني شويه
وخلي عندك حنية
وللا إنت يعني كده فاضيلي
تعبت انا والله أسيه

همسات

همسات

وجت ع بالي

ان حياتي ف يوم تحلالي

واتغير واكون حاجة ثانية

ومتاعبي انساها ف ثانية

والدنيا

بدأت تضحكلي

وتجمل وتذوق شكلي

وخلص

إنتهت الأحزان

والفرحه

بقى ليها مكان

ويا فرحة قلبي كده تعالى

دا انت يا غالية وحشاني

ياما عشت احلم تزوريني

والناس م الفرحة تهنيني

وياربي ----

شكرا ع نعمك

دا انا خيرى كله م كرمك

حكاية عاشق

يا حبيب عيوني

حبك ف قلبي

مهما لاموني

انت الحنان ---- انت الأمان

ولا يمكن اقبل بديل لحبك

مهما جابولي

يكفيني أشوفك

واملي عيني

ويعدي طيفك

أنيس ف ليلي

حبك ف قلبي
هو اللي باقي
ياما داريت عن الناس أشواقي
لكن عيوني
كانت مرايتي
ولهفة قلبي
كشفت حكايتي
وحاولت إداري
علشان عزولي
في يوم ما يعرف
ويكشف ظنوني
حبك ده عايش
كده جنب روحي
وغلبت إداري

لتبان جروحي
جرحي ف غيابك
ألمه شديد
حاسة بعذابك
وأنت وحيد
لكن يا قلبي طمن ظنونك
أنت اللي لية
لو طال بعادك
وانا ليك وفيه
وبلاش عنادك

طمن قلبك

يا حبيبي طمني بكلمة
وانا هستناك عمرى بحاله
والله بحبك والنعمة
دا انا قلبي ف بعدك ياما جاله
بتحاول تبعد ليه عني
وتزود هجري وحرماني
قرب وياريتك تطمني
وكفاية ياسي واحزاني
عارفة ظروفك كانت صعبة
بس ف بعدك قلبي بيعاني
حبنا صادق مهوش لعبة

مين يعني فينا بقي الجاني؟؟

هجرك سكينه بتقتلني

وتزود اشجاني وهمي

ليه متعمد كده تهملني

وفي لحظة حب بتطعني

ذنبي اني يعني حبيبتك

صدقت كلامك ووعودك

ووقفت ف صفك وجاريتك

وحكمت عليك كل شهودك

ياما قلت

بحبك وانا اصدق

والحلم قرب يتحقق

بس باصرارنا وارادتنا

نقدر نكمل سعادتنا

وانا واقفة ف صفك
مش هاخضع
لكلامهم ولا يوم راح
اركع
حلمي اني أكمل وياك
وحياة القلب اللي هواك
هنحقق فرحة أيا منا
والسعد هيبقى قدامنا

بوح بهواك

يا حيرتي

في حبك وهواك

مهما أعمل مش قادرة أنساك

وبيزيد الجفا

واترجاك

مطرح ما تروح قلبي

معاك

ليه تبعد وانا باتمناك

وهاجرني وذنبني اني اهواك

قرب تلاقيني

باستناك

تتهني معاي وانا وياك

كفاياك هجر

بوح بهواك

طيفك ف خيالي

والله انا دايب

فيك دوب

وهو اي ف حبك مغلوب

واتمني اعيش عمري معاك

واحقق لك كل هناك

تحيني بنظرة م عيناك

ولو غبت قلبي يقول فينك

ويوماتي

طيفك ف خيالي

شاغل ع طول دايم حالي

يا حبيبي

حبك بالدنيا
مقدرش ابعد
عنك ثانية
تفارقني روي
ولا افارقك
واتمني ف الدنيا
أشاركك
ونعيش ونحكي حكايتنا
ونعلم الناس قصتنا

حبك شريان الحياة

بحبك ياللي حبك

دايما ف قلبي جديد

ولما أشوفك باحس

ان كل يوم ف عمري دا يوم عيد

حبك زرع ف قلبي الحنان

ورد خدودي بورد الجنان

حبك ف قلبي ف حبل الوريد

مربوطة بيه ودايما سعيد

حبك خلاني أحب الناس

وزرع ف قلبي شوق وإحساس

حبك نساني حتي الجنون

وروي حناني بورد الغصون
شأيفة ف حبك الكون جميل
وعرفت ان مفيش مستحيل
هو ده نبض الحياة
ووجودك معاي طوق النجاه
حبك ف قلبي سر الوجود
علمني حبك ازاي أجود
يارب احميلي اغلي حبيب
واعيش ف ظله
ولا يوم يغيب
دا وجوده جنبي
عشقي ومناي
يارب دايما
دايما معاي

نظرة تحييني

نظرة م عينك ترويني
قبلة ع خدك تهديني
ولحظة ف قربك تكفيني
وانا باحلف
والله يميني
ان وجودك
ده بيحييني
ويقوي عزيمتي وايماني
في غيابك ظلمي وحرماني

شعاع النور

لما شعاع النور

بينور

تلقني خيوط الليل

اتغير

رسم الفجر ملامحه وصور

وقال للصبح تشطر غير

صحي النائم ---- الكسلان

قوله يصلي ---- للرحمن

وادعي وقوله بركة وغفران

والحق وقتك قبل أوان

انوي الخير والباقي ع الله

هو الرازق ---خيرہ ماشاءاللہ

یرزق نملة ف قلب الشق

والحجر الصوان بیرق

جارحني بعناده

ويا طيبة قلبي

وانا باقاسي

من حبي بيزيد احساسي

ولا حاسس أصلا

بوجودي

وكأني نقطة ف حدودي

او ذرة مش باينة قصاده

ومن خيبتني مش طايفة بعاده

وعلي قد عناده انا باحبه

واتمني اكون دائما جنبه

وساعات بيجرحني كلامه

واتمني لو جيت ف منامه

مش جايز يوم يشعر بيه
ويقدر معني التضحية
مش جايز يعرف يوم قيمتي
ويعيش ويدوق كده حيرتي
انا عمري ماهقدر انساه
واتمني اكون كده وياه
يخاصمني وماله وانا اصالحه
يحاسبني وشايفله مصالحه
دا الحب يا ناس اغلي هدية
ويارب يهديه كده ليه
واشوفه زي ملهوف
وعينه مليانة بالخوف
لو ضيعت هيعيش ازاي
دي الفرحة والحب معاي

ومين فينا

ومين فينا--؟؟؟

مهوش مجروح

وبينازع بصوت منبوح

من الغدر ومن الحرمان

ومن الظلم يا بني إنسان

ومين فينا --؟؟

بيصون العهد

وعلي المبدأ يقيم الحد

ومين فينا --؟؟

بكي ف فراق

علي غالي له يوم أشتاق

علي أقرب ماليك يبعوك
علي اصحابك جايز يخونك
علي عشرة هانت بالكوم
علي صحبة مليانة هموم
ومين فينا --؟؟

يا ناس وده فين
لو ندور ما نلقي اتنين
لكن السنة ---

في خير وفي شر
هنلقي عقوق وفي بر
ويارب خفف اوزارنا
وأقبل يارب اعذارنا

صدق الودع

سألت -----

مين الجدع

اللي بيحب بجد

قالولي هات الودع

يمكن تصدق حد

سألت أهل الهوي

ليه الهوي غلاب

قالولي م غير دوا

الحب له اسباب

اسأل مجرب داب

من الحب يحكيك

هو جماله عذاب

أحكي وأنا أشكيك
سألت ناس اليوم
عن الحب وعذابه
سمعت قسوة ولوم
يا مر اسبابه
قولولي اليوم مفيش
صعب تلاقي حب
راح زمن الدارويش
والمجدعة والطب
علشان بقاينا خلاص
في زمن قسوة ومال
وراح زمن الإخلاص
وتبدل معاه الحال
وقفت وحدي حزين

تايه وسط الطريق
ودموعي مالية العين
وبادور عن الرفيق
بس اكيد ف يوم
هلاقي محبوبي
مهما تزيد الغيوم
دا قدرني ومكتوبي

باعشق تفاصيلك

باعشق تفاصيلك وملامحك

ولو قلبي يزعل انا مسامحك

وباشوفك بعيوني وقلبي

واتمني الاقبيك دايمًا جنبي

وباتغاضي عن كل عيوبك

وبتحمل غضبك وذنوبك

باعشق تفاصيلك وملامحك

طاقة أمل

وامتي يا زمن ترضي
علي المغلوب ع امره
ورافض ليه كده تهدي
كفاياك اللي ضاع م عمره
حن ورق واديه نصيبه
وافتحله باب للأمل
وفرّح قلبه بحبيبه
يمكن حلمه يكتمل
افتحله طاقة نور
وعوضه ع اللي فات
قوله عليك الدور

انسى بقي اللي مات

نصيبك كان ف أمان

اتهنى بالله وعيش

صبرت يا غلبان

افرح وماتبكيش

سفينة نوح

سكت الكلام

خلاص----

وما بقاش له اي لزوم

حتي السلام

يا ناس

مليان كمان هموم

اليأس ما خلاش

في زمن كله عيوب

والعمر راح ببلاش

ويقولو عليه مكتوب

نفسي الصبر يعود

جوا نفوس الناس
وكفاية حقد وجحود
فوقو اوام يا ناس
الظلم بقي طوفان
بيغرق المساكين
عايزين سفينة أمان
تهدي لنا الضالين

بلاش غرور

راح تبعد

وانا هابعد أكثر

وبتعد

دا انا عندي أكبر

ولا فارقة حب واشواق

ولا عمري لحبك هاشتاق

مين باعني

هابيعه ببلاش

وكأنه ولا

كان ولا جاش

ليه فاكريني

ما اعرش أعيش

من غيرك

الدنيا متمشيش

كفاياك

خفة وغرور

بتمثل

وعايش ف الدور

لو كنت ناوي

ياللي مشغول

بس بية

وبتتمني حتي الملاغية

قلبي برضة مشغول بيك

بس قلبي مش هفية

لو عايزني

تطلب ايدي

تبعت اهلك عندي يا سيدي

ساعتها اعرف لو كنت ناوي

وافرح واجهز اليوم ده عيدي

شرف تمور وتزين حارتنا

بكره هحكى للناس حكايتنا
بس المهم تنوي وتيجي
اياك تفرح فيا جارتنا
وانا من الوقتي ف انتظارك
هافر ح علشان كنت اختيارك
بسرعة يالله لو كنت ناوي
هنعرف جدك من هزارك

شكوي قلم

معدش ينفع الكلام

تعب القلم وخلاص سلام

من كتر ما كتب شكوتي

ضيعت كل محبتي

شكوي ومذلة

من غير اسباب

وتعبنا نطوي ونفتح

كتاب

كفاياك وعود

اصلك بتنسي

قلبك جحود

تملي تقسي

وكتبت همي ف اوراق كثيرة

وشكيت لعمي بدموع غزيرة

ومفیش فيه فايدة

يومين وترجع

بعد المعايدة

عرفت تخدع

تعبت قلبي

وتعب الكلام

ياريت تشوفلك

حل اوام

فرحة عمري

يا حبيب العمر ولياليه
يا مفرح قلبي وعينية
انا لحظة في قربك ترضيه
يكفيني بس الحنية
بس اوعي ف يوم تقسي عليا
دا انا قلبي متعلق بيك
ودوايي ف قربك يا عينية
وبعمري كله افديك
اصلك يا حبيبي فرحة عمري
ولا ليا غيرك ف حياتي
وفي حبك سلمت انا امري

ورفضت استسلم لسكاتي
اعلنت لكل الناس حبي
وخضعت لقلبي واحكامه
ورفعت الراية كده لقلبي
علشان تتحقق احلامه

آه يا غربتي

وآه يا قمر

اسمع وسمع شكوتي لله

واحكي له ع غربتي

والعمر اللي ياما عداه

قوله يا قمر

وابعت لاهلي سلام

واحكي له ع اللي قاسيته

ف غربّة الايام

والوحدة كانت سلوتي

في عتمة الاحلام

ومصيري غربّة يا قمر

ولا ليا فيها حبيب
بأعمل عشان لقمتي
وإداري كمان دمتي
واكتم لهيب لوعتي
لحد ما القي طبيب
يجي النهار ورا ليل
والوحدة صمت وويل
يمر بيا الزمن
والناس حسداني عشان
في الغربية بقالى سنين
ويقولوا حوش وجمع
وفي حكمهم ناسين
عمري اللي عدي وراح
ما بين فراق ونواح

وكفيل يهين ف ابوك
وناسك كتير نسيوك
وان مات ابوك او عمك
يمكن مابيعزوك
وان قلت عايز إجازة
اشوف عيالي وارجع
يقولوا مالها عازة
واقبل كلامهم واخضع
وتعدي السنين وتجري
وياريتك يا عمر تكفي
اروح اشوف الحبايب
يمكن القالي نايب
وفي حد لسة فاكرني
اعيش ولو يومين معاهم

وانسي اللي كان ظالمني
ودى رسالتي ليك يا قمر
تهدي سلامي لعيلتي
تعبت انا م السهر
وما حد حاسس حيرتي
واكيد ف يوم يا قمر
هنشوف حبايبنا
ونحكيلهم ع اللي جري
وازاي كده تعبنا
بس نسينا تعبنا
بعد اما شوفنكم

بحر الهوي

نزلت بحر الهوي

وعمري

ما ارتويت

وانا قلبي

لما نوي

صبرت انا وعديت

ومسكيت حبل الصبر

وقولتله -----مالك

لا في حساب ولا جبر

وتغير كمان حالك

لاقيت الموجة عالية

جايز تعديني
والعمر راح ف ثانية
وانا اللي ناسيني

حبك حياتي

ياللي حبك غير حياتي
وادي معني كبير لذاتي
او عي تبعد تاني عني
ازاي هتعد وانت مني
خليك دايم جنب قلبي
انت عيني وانت عمري
باهدي ليك حبي وحياتي
وجودك ادي معني لذاتي

إيه ذنبي في هواك

رافض حبي وحناني

واش بعدها وياك

قاسي وعلية جاني

وذنبي انني باهواك

كله ف حبك لاموني

وقالولي اني انساك

حتي دموعي وجفوني

اتحجروا ف هواك

سايق عليا تقلك

وناكر حب السنين

والقلب لو ما راقالك

يروق بس لمين؟؟ ؟
دا أنت شمس ونهاري
وحب بقاله زمان
نفسى تنورلي داري
وادوق كأس الحنان
نفسى تبطل آسية
وتفكر ف اللي شاريك
وبلاش اكون ضحية
وفي يوم قلبي يعاديك
إديني فرصة ثانية
يمكن قلبك يلين
تلاقيه جه ف ثانية
متزود بالحنين

المحبة للأحبة

المحبة للاحبة

دا شئ جميل

واللي بخته يسعده

يلقي حبيبه يؤنسه ف ليل طويل

واللي راح يحكي حكاوي

واللي رافض للفتاوي

اصل حبه دا حب عابر سبيل

واللي رفع خلاص الرايه

واللي كمل الراوية

اصله شايل جوا قلبه حب كبير

بالمحبة حبة حبة

راح اكيد تسعد قلوب العاشقين

واللي ضاع منه حبيبه

او فكر يوم يسيبه

عمره ما هيلقي بديل

المحبة عايزة صبر

مش حساب هي وجبر

المحبة للأحبة

محتاجة يصنع المستحيل

والمحبة مش كلام

او يزورني طيفه ف منام

المحبة طريق طويل

بنخطي بيه ألف ميل

أصرخ يا رمل الوطن

أصرخ يا رمل الوطن

الظلم ماله اتفطن

والدمع سال الخد

ودبل ونشف الورد

من حرقة المظلوم

ومن ضناه محروم

أصرخ بعلو الصوت

واضربنا بالنبوت

يمكن ف يوم نتلم

ويخف عنا الهم

أصرخ يا رمل الوطن

وجهز خلاص الكفن
لجنود غلابة واقفين
وعن الديار غائبين
ضحوا وماتوا بلاش
الظلم ما خلاش
اصرخ وقول ده حرام
يا ظلمة الأيام
عايزينها سوريا دمار
وقسوة استعمار
اصرخ يا رمل الوطن

حلم العمر

يا قمر

ومنور ليلى

اتمني ف الحلم

تجيلى

واشوفك واملى

عينية

والدنيا تملها عليا

ويا وحدة

لياليك طويلة

والذكري

في قلبي جميلة

الليله ف بعدك

سنين

والقلب مسكين وحزين

ويا فرحة عمري ولياليه

ويا ظلم ف بعدك باسيه

فرحني وخليك وياي

يوم قربك

هو مناي

وجع النسيان

ويا نقطة ف بحر احزاني

كل ما انسائك ارجع تاني

لكن انت ولا فارقة معاك

انسائك او حتي اهواك

يا ظلمني للظلم حدود

وناكرني ليه وانا موجود

احتارت ازاي انا ارضيك

واحايك وبحبي اهديك

بس انا ولا باخطر ع بالك

وبعادي ولا غير احوالك

نسي المعاد

حسيت برعشة وخوف

ونبض قلبي زاد

وبكيت وانا ملهوف

معقول نسي المعاد

وقعت مني الحروف

وجمعت ثاني افكاري

وفكرت بصوت عالي

اصلك انت اختياري

والصعب عليا غالي

وندمت من جوايا

ازاي يهون هوايا

وينسي اللي كان
أظن كده كفاية
لا لوم ولا عتاب
وياريت نطوي الكتاب
يمكن انسي هواك
وارتاح م العذاب

فرصه تانيه

افتح قلبك للي يحبك
وبلاش تقسي تملي عليه
طول العمر بيطلب ودك
وانت تملي رافض ليه
اديه فرصة يقرب منك
جايز تفرح وانت معاه
يعني هتاخذ ايه م عندك
انت سعادتك اكيد وياه
قرب منه بس شوية
تلقي هواه كله حنية
ادي قلبك فرصة وفكر

سيبك حبه م الانانية
اوعي تضيع حب كبير
وبلاش تقسي عليه وتغير
هي الفرصة لما بتيجي
مش محتاجة يا سيدي تفكير
ارضي حبيبك وقرب منه
عيش وياه وأسأل عنه
اوعي تسببه تايه م غيرك
ياالله بسرعة سوا اتهنوا

قلبك حجر

غلبت احايل فيك
لكن انت قلبك حجر
وشكيت منك واليك
وما جاني لسة خبر
قاسي وعلية ظالم
وتملي ناسيني
لكن انا دايم مسالم
والدمع ف عيني
يعني اخرة هواي
الهجر والحرمان
دا انا كان نفسي ومناي
ارسي ع بر أمان

شريط الذكريات

اشكي ليه

واحكي ليه

واللي بينا قسينا فيه

فين كلامك

فين ملاعك

فين عيونك

ازاي قدرت يوم تخونك

فين ملامحك

طعم جرحك

واللي كان

واللي زان

واللي
بدل الحنان
مش مهم
المهم اني عرفتك
كان أهم اني صارحتك
بعنتي بحبة فلوس
ليه بنضغط ع النفوس
ليه ع حبي تدوس
غصب عنك وللا عني
الظروف كات اقوي مني
واللي خططناه زمان
راح كأنه يوم ما كان
واللي باقي جرح
ينزف ع السنين

شرح مش ممكن يلين
كان بعاذك مستحيل
رجع شريط الذكريات
وارسم خريطة حب فات
يمكن تندم م سكات
إيه فاضلي---؟؟
بعد غدر سنين طوال
إيه يطفئ ف قلبي نار
إيه يكفي لو ف تار
قلبي مجروح م الزمن
واللي جرحه قبض التمن
بس أعرف انه كأس
كأس ودائير م الأساس
بكره قلبك ينجرح

هو يعني أمتي فرح
بكره تنذل ف هواه
بكره تتمني ف رضاءه
ساعتها بس هتفتكر
مين يا قاسي اللي نكر
مين اللي باع
ومين اللي خان
مين اللي تابع للشيطان
مين بيتقطع عشان
يلقي نظرة م عينيه
واللي كلمة بتواسيه
لاء يا قلبي
خلاص يكفيه

إنت كل مالِيّه

دا أنت الدنيا

وكل مالية

علمتني معني الحنية

وتغيرت شوية شوية

وبقيت بحر حنان يا عينية

قلبي يرق لاي كلام

فكري سارح ف الاحلام

حابة معاك طعم الأيام

عمري ف حبك ولا اعرف كام

عايشة طفولتي ويا شبابي

عارفة غيرتي سر عذابي

باكتب حيرتي جوا كتابي
بانسي شقاوتي معاك وغيابي

علشانہ يهون المر

في حلم كبير

ويا ما داريته

دموع عيني

ويا ما قاسيت

ولا يجيني

ومن حبه ياما تحملت

وعلي هجره يا ناس مقدرت

قبلت اكمل مشواري

وزاد جواي اصراري

علشان حبي

يهون المر

علشان كلمة تراضيني

علشان لحظة تدفيني

اعيش محبوسة

ويعيش هو

وماله

حر

من نبض قلبي

إنت عارف إن بعدي
غصب عني ---- مش بيدي
لسة حبك جوا قلبي
مهما تبعد حتي عني
مش ناسيك ولا حتي ناكر
طمن قلبك ---- قلبي فاكر
كل لحظة كات ما بينا
كل كلمة ليها قلنا
إنت حبي واشتياقي
عارفة صعب عليك فراقي
نفس اضمك بين يدي
نفس اكحل بيك عينية

أيامنا الحلوه

طيفك تملي معاي
ملازمني ليل ونهار
ياريتك تحن كفاية
في بعدك انا بانهار
ناديني لو باشارة
جبت القساوة منين
في البعد انا محتارة
واخرتها ايه بعدين
كان بينا شوق وحنين
وليال حب طويلة
نسيت حب السنين

وايام عمري الجميلة
ما كانتش كلمة اتقالت
تزرعل وتبعد ليه
الدمعة ف عيني احتارت
بتحبني وللا ايه
ارجع لحضني وحناني
واروي عطش البعاد
عمرك ما هتلقى مكاني
كفاياك هجر وعناد
قلبي مفتوح لقلبك
ومن غيرك انا حزين
اتمني اعيش انا جنبك
وانسي تعب السنين

مكتوب علينا الهوي

مكتوب علينا الهوي
ومفیش مفر يا ناس
وياريتنا نبقي سوا
وتحبني بإخلاص
وانا جنبك بانسي نفسي
واقدر اكمل حياتي
اوعي يا حبيبي تقسي
وتزود وجعي واهاتي
حبنا هيكون أسطورة
يتحاك ف الموويل
وانا جنبك كده ف الصورة

مرضاش غيرك بديل
عارفة ان هواك نصيبي
وانا راضية بالمكتوب
خليك دائما حبيبي
في حبك معرفش أتوب

حبك وهم كبير

عشت ف حبك وهم كبير
ورفضت أخضع وأسمع عقلي
ياما حكولي وقالوا كثير
وقلبي مش راضي يصدقني
عشت اتمني اسمع كلمة
تروي عطشي تداوي جروحي
خاب ظني فيك والنعمة
وانا بابكي واداري ف نوحى
انا دلوقتي لاقيت حريتي
فكيت كل قيودى بيدي
دا انت ف يوم لاغيت شخصيتي
ونسيت معاك جميع مواعيدي

العشق المستحيل

حبي وقلبي انطعنوا بيدك

ايه ف الدنيا

ممکن يفيدك

هتعيش تاني هجر وحرمان

ولا هتشوف ولا لحظة أمان

غدرك بية كان ع كيفك

ياما حاولت الاغي انا طيفك

لكن كان دايم مشغول

وعن احواله كان بيقول

انك بايع حبي اكيد

ودموع عيني مش هتفيد

يا خسارة قلبي المجروح
من المي عمال بيبوح
لكن لازم كمان اتغير
واهجر حبك ولا اتحير
انت خسرت بهجرك لية
انت الجاني وانا ف ايدي
اسعد قلبي بحب جديد
ابعد عنك وفكري سعيد
اني خسرت لكن كسبان
بعدك عني خلاني إنسان
كنت اناني حتي ف حبك
ياما نسيت روعي وانا جنبك
لكن الوقتي قيودي خلاص
وانت بايدك كنت اساس

عائشة انا حالة غريبة علي
يمكن نادمانة انا شوية
لكن هقدر تاني أعيش
من غير حبك ما يلزمنيش
يا الله حبيبي خلاص
باي باي
دايما كنت سبب ف اذاي
والوقتي انا حر طليق

يا ساقيني كأس الحرمان

ومسبب دايمًا أحزاني
علي بعدك بعد الأيام
ولا عارف باقي منهم كام
وتعبت من وحدة طويلة
ولا عادش في عندي حيلة
هتحن أمتي وتيجي تاني
ما كفاية هجري وحرماني
يامنشف الدمعة في عيني
ومضيع فرحتي بسنيني
بابعتك طيفي في أحلامك
يلاغيك وتشوفه في منامك

بس انت يظهر مش شايفه
ومزود بالهجر مخاوفه
كفاياك تعبت آسية
ماتخلي فى قلبك حنية
وارجعلي تلاقيني مستني
ومجهز قلبي كده تملي
من الهجر حاساك تعبان
وبتدور على بر أمان
وامانك وراحتك وياي
ارجعلي واتهنى معاي

مبروك لمصر

سجل يا تاريخك امجادنا
واكتب النصر لاولادنا
من اليوم هنسجل ف ميلادنا
والنصر اخيرا لبلدنا

سجل يا تاريخ صوتنا العالي
والفرحة طالعة وبتلالي
والحضري وصلاح الغالي
جددوا بالمكسب اعيادنا

ويا بلدى دايما منصوره

علي الجبهة وكمان ف الكورة
وانشالله دايما ف الصورة
وتعيشي يا فرحة اولادنا

شايفين الشارع والحارة
وذغاريد وتهاني محتارة
من الفرحة دموعنا منهارة
ويارب كتر أعيادنا

في الكورة تلاقينا يد واحدة
وقلوب ع النصر متحدة
من غير غل وناس جاحدة
والله ع الفرحة يا بلدنا

غلبت احايك

ياللي حبك نبض قلبي
حس بيا دا أنت جنبي
أعمل إيه غلبت احايك
وانت جو القلب شايلك
دمع عيني دوب خدودي
وانت ولا حاسس بوجودي
باشكي ليك بس ف سري
وانت بالمي قاعد تحلي

وفي بوعودك

يا حب العمر وسنينه
وصبر المر وحنينه
دا حبك نبض وجداني
معاك انا بانسي أحزاني
دي لحظة ف قربك تكفيني
مجرد نظرة ترضيني
يا شمعة منورة ليلي
دا بعدك هد لي حيلي
كفاية بعادك بقي عني
قرب تعالي هنا عندي
وفرح قلبي بوجودك
ياريت توفي بوعودك

الخيـط الرفيع

بين الألم والأمل

في خيـط رفيع

بسـ جاهـد بالعمل

تلقي عزمك سده منيع

وكفاية حزن عـ اللي راح

أبدا حياتك مـ جديد

أطوي اللي فات مـ غير جراح

من غير ارادة ولا شئ يفيد

هو الألم كان الطريق

علشان حياتك تبدئ

بس اختار الرفيق

اللي معاه راح يهتدي

مهما الدموع زادت ف يوم
صبرك عليها ف أمل
لازم تخف عنا الهموم
بس انت جاهد ف العمل
ربك بيجازي الصابرين
اصبر بقي خليك صبور
ملناش غير الله معين
قادر يحول الضلمة نور

ناوى تكمل

لو كنت ناوي تكمل

حكايتنا قولي اوام

قلبي الضعيف اتعلم

وفاق من الأوهام

لو كنت ناوي تكمل

وتلخص الموضوع

دا القلب ياما أتألم

وبكي وبات موجوع

مش عارفة ايه يرضيك

ملاوعيني ليه فى هواك

بادعي ربنا يهديك
ويثبت دائما خطاك

ريح بالي وبالك
ووضح غرضك ايه؟؟
يرتاح فكرك وحالك
ونعرف نهايتنا ايه

محتار حتي في كلامك
ومحير قلبي معاك
ارسي على بر مالك
انا انسان مش ملاك

محتوى الكتاب

م	المحتوى	الصفحة
1	بطاقة الكتاب	2
2	الإهداء	3
3	مقدمة	4
4	للم جروحك	5
5	ماكانش عشمى	7
6	فرحة عمرى	9
7	جرح متفصل	11
8	همسات	13
9	حكاية عاشق	15
10	طمن قلبك	18
11	بوح بهواك	21
12	طيفك فى خيالى	23
13	حبك شريان الحياة	25

27	نظرة تحييني	14
28	شعاع النور	15
30	جارحني بعناده	16
32	ومين فينا	17
34	صدق الودع	18
37	باعشق تفاصيلك	19
38	طاقة أمل	20
40	سفينة نوح	21
42	بلاش غرور	22
44	لو كنت ناوى	23
46	شكوى قلم	24
48	فرحة عمرى	25
50	آه ياغربتى	26
54	بحر الهوى	27
56	حبك حياتى	28

57	إيه ذنبى فى هواك	29
59	المحبة للأحبة	30
61	اصرخ يارمل الوطن	31
63	حلم العمر	32
65	وجع النسيان	33
66	نسى الميعاد	34
68	فرصة ثانية	35
70	قلبك حجر	36
71	شريط الذكريات	37
75	إنت كل مالیه	38
77	علشان يهون المر	39
79	من نبض قلبى	40
80	أيامنا الحلوه	41
82	مكتوب علينا الهوى	42
84	حبك وهم كبير	43

85	العشق المستحيل	44
88	ياساقيني كاس الحرمان	45
90	مبروك لمصر	46
92	غلبت أحاييك	47
93	وفى بوعودك	48
94	الخيطة الرفيع	49
96	ناوى تكمل	50
98	محتوى الكتاب	51